

Serviciu de Planificación Llingüística y Normalización

RESOLUCIÓN de 28 de xunu del 2016 pola que se convoquen los premios «Xosefa Xovellanos» de Novela, «Xuan M.^a Acebal» de Poesía, «Máximo Fuertes Acevedo» d'Ensayu, «María Josefa Canellada» de Lliteratura Infantil y Xuvenil y «Alfonso Iglesias» de Cómic en llinuga asturiana

RESOLUCIÓN

Fomentar la creatividá lliteraria contribuye ensin dulda nenguna a desenvolver el conteníu cultural de la sociedá, sobre manera teniendo en cuenta la importancia de la lliteratura, en cualquier de les tantes de manifestaciones que tien nel nuestru tiempu. Ye bien sabíu tamién que la escritura, que surge de la voluntá de creación y comunicación, lleva con ella un trabayu personal importante, una dedicación de tiempu y esfuerciu que, ensin ser midibles no económicu porque'l valir propiu de la lliteratura tresciende talos parámetros, sí que se puen reconocer y incentivar polos poderes públicos. Por ello, la Consejería d'Educación y Cultura del Principáu d'Asturies vien convocando con calter anual dellos premios lliterarios dirixíos a consolidar, arriquecer y prestixar la llingua y cultura asturianas.

FECHOS

Primero.— Cola mira de llograr esti oxetivu, por Resolución d'esta Consejería de 5 de marzu del 2009 (*BOPA* de 27 de marzu del 2009), aprobáronse les bases de los premios «Xosefa Xovellanos» de Novela, «Xuan María Acebal» de Poesía, «Máximo Fuertes Acevedo» d'Ensayu, «María Josefa Canellada» de Lliteratura Infantil y Xuvenil y «Alfonso Iglesias» de Cómic en llingua asturiana, modificaes por Resolución de 23 de xunetu del 2015 (*BOPA* de 30 de xunetu del 2015).

Segundo.— Na Llei del Principáu d'Asturies 11/2014, de 29 d'avientu, de Presupuestos Xenerales del Principáu d'Asturies pal añu 2015, prorrogaos pal 2016, hai creitu específicu pa estos fines na partida presupuestaria 14.04.422R-482.062, denominada “Premios literarios en lengua asturiana”. Y el Plan Estratéxicu de Subvenciones de la Consejería d'Educación y Cultura pal exerciciu 2016 (aprobáu por Resolución de 30 de marzu del 2016 y publicáu en *BOPA* de 5 d'abril) prevé la convocatoria de los cinco gallardones mentaos. Por tanto, procede agora la convocatoria d'estos premios:

- Premiu «Xosefa Xovellanos» de Novela n'asturianu na so trixésima séptima edición;
- Premiu «Xuan M.^a Acebal» de Poesía n'asturianu na so vixésima segunda edición;
- Premiu «Máximo Fuertes Acevedo» d'Ensayu n'asturianu na so vixésima segunda edición;

GOBIERNO DEL PRINCIPADO DE ASTURIAS

CONSEJERÍA DE EDUCACIÓN Y CULTURA

- Premiu «María Josefa Canellada» de Lliteratura Infantil y Xuvenil n'asturianu na so novena edición; y
- Premiu «Alfonso Iglesias» de Cómic n'asturianu na so octava edición,

enfotaos en qu'actuaciones d'esti calter contribuyen de manera eficaz a dinamizar l'actividá cultural de la Comunidá Autónoma, y n'especial un aspectu bien importante de la mesma como ye'l de la creación lliteraria.

Tercero.— Acordies cola Resolución de 16 de mayu del 2005, de la Consejería d'Economía y Alministración Pública, pola que s'establez el sistema d'información contable de l'Alministración del Principáu d'Asturies y el so sector públicu y s'aprueben les normes de los procedimientos de xestión, tramitación y réxime de contabilidá na execución del presupuestu de gastos, la Intervención Delegada, en fecha 24 de xunu del 2016, emitió'l correspondiente informe fiscal favorable.

FUNDAMENTOS DE DERECHU

PRIMERO.— L'artículu 3 del Decretu 71/92, de 29 d'ochobre, que regula'l Réxime Xeneral de Subvenciones, en relación col artículu 38 de la Llei 6/1984, de 5 de xunetu, del Presidente y del Conseyu de Gobiernu; l'artículu 5 del Decretu 6/2015, de 28 de xunetu, del Presidente del Principáu d'Asturies, de Reestructuración de les Conseyerías qu'integren la Comunidá Autónoma, mesmo que l'artículu 10 de la Llei 2/1995, de 13 de marzu, sobre Réxime Xurídicu de l'Alministración del Principáu d'Asturies; too ello no que fai a la determinación de les competencies y facultaes p'adoptar esta resolución.

SEGUNDO.— D'aluerdu col artículu 37 de la Llei 2/1995, de 13 de marzu, sobre Réxime Xurídicu de la Alministración del Principáu d'Asturies y la Resolución de 2 d'ochobre del 2015, de la Consejería d'Educación y Cultura (*BOPA* de 10 d'ochobre), ye competencia del titular de la Dirección Xeneral de Planificación Llingüística y Normalización l'autorización y disposición de los gastos, distintos de los contratos menores, que se financien con cargu al programa presupuestariu xestionáu pola Dirección Xeneral.

TERCERO.— Sicasí, por razones d'economía procesal y simplificación de trámites, puede l'Ilmo. Sr. Conseyeru conocer d'esti espediente avocando les competencies delegaes n'aplicación del artículu 17 de la Llei 2/1995, de 13 de marzu, sobre Réxime Xurídicu de l'Alministración del Principáu, al tramitase conxuntamente toles fases del espediente de gastu.

CUARTO.— Ye aplicable lo establecíu na Llei 38/2003, de 17 de payares, Xeneral de Subvenciones y el Decretu 71/1992, de 29 d'ochobre, de Réxime Xeneral de Concesión de Subvenciones.

En base a lo acabante esponder y acordies colo previsto nos artículos 8 c) y 41 del Testu refundíu del Réxime Económicu y Presupuestariu, aprobáu pol Decretu llexislativu del Principáu d'Asturies 2/1998, de 25 de xunu, pola presente

RESUELVO

PRIMERO.— Convocar estos premios:

—«XOSEFA XOVELLANOS» DE NOVELA n'asturianu (trixésima séptima edición), con una dotación de 3.000 (tres mil) euros, pa obres de tema, xéneru y estructura llibres que tengan una estensión mínima de setenta y cinco páxines a espaciu doble.

—«XUAN M.^a ACEBAL» DE POESÍA n'asturianu (vixésima segunda edición), con una dotación de 3.000 (tres mil) euros, pa obres de tema, xéneru y estructura llibres que tengan una estensión mínima de quinientos versos.

—«MÁXIMO FUERTES ACEVEDO» D'ENSAYU n'asturianu (vixésima segunda edición), con una dotación de 3.000 (tres mil) euros, pa obres de tema, xéneru y estructura llibres que sían inédites y tengan una estensión mínima de cincuenta páxines escrites a espaciu doble.

—«MARÍA JOSEFA CANELLADA» DE LLITERATURA INFANTIL Y XUVENIL n'asturianu (novena edición), con una dotación de 3.000 (tres mil) euros, pa obres de lliteratura infantil o xuvenil —con independencia de que sían noveles, compilaciones de cuentos, poemarios o obres de teatru— una y buenes sían inédites y tengan una estensión mínima de doscientos cincuenta versos pa la poesía y de trenta páxines a espaciu doble pa los demás xéneros.

—«ALFONSO IGLESIAS» DE CÓMIC en asturiano (octava edición), con una dotación de 3.000 (tres mil) euros, pa obres d'estilu, tratamientu y tema llibres, pudiendo abarcar el desarrollu d'una historia única o un conxuntu d'histories (rellacionaes o non ente sigo). Pa participar habrá presentase un proyectu inicial con una estensión mínima de quince páxines, teniendo en cuenta que les obres presentaes habrán ser inédites y non premiaes n'otros concursos y que la estensión total de la obra habrá tener un mínimu de 50 páxines.

SEGUNDO.— Avocar el conocimientu de los actos delegaos de gastu, autorizando un gastu por importe de 15.000 (quince mil) euros con cargu a l'aplicación presupuestaria 14.04.422R-482.062 de los Presupuestos Xenerales del Principáu d'Asturies pal 2015, prorrogas pal 2016.

GOBIERNO DEL PRINCIPADO DE ASTURIAS

CONSEJERÍA DE EDUCACIÓN Y CULTURA

TERCERO.— Esta convocatoria va mandase poles bases reguladores aprobaes por Resolución de 5 de marzu del 2009 (*BOPA* de 27 de marzu del 2009) de la Consejería de Cultura y Turismu, modificaes por Resolución de 23 de xunetu del 2015 (*BOPA* de 30 de xunetu del 2015).

CUARTO.— Presentación d'orixinales, sitiú y plazu

Les obres tienen que se presentar nel Rexistru Xeneral Central de l'Alministración del Principáu d'Asturies (Edificiu Alministrativu, c/ Coronel Aranda, e/n, planta plaza, sector central, Uviéu) nos plazos siguientes:

- Premiu «Xosefa Xovellanos» de Novela: hasta'l 30 de setiembre del 2016.
- Premiu «Xuan M.^a Acebal» de Poesía: hasta'l 30 de setiembre del 2016.
- Premiu «Máximo Fuertes Acevedo» d'Ensayu: hasta'l 30 de setiembre del 2016.
- Premiu «María Josefa Canellada» de Lliteratura Infantil y Xuvenil: hasta'l 30 de setiembre del 2016.
- Premiu «Alfonso Iglesias» de Cómic: hasta'l 16 de setiembre del 2016.

En tolos casos, les obras han presentase en dos sobres cerraos nos que figure'l nome del Premiu y se faga constar el títulu de la obra y el seudónimu del autor/a. Caún de los sobres tien qu'incluyir:

SOBRE A: datos del autor/a (señes, teléfonu y un currículum d'estensión curtia);

SOBRE B: orixinal y cuatro copies del testu en formatu papel (les obres que se presenten al Premiu «Alfonso Iglesias» de Cómic tienen que se presentar tamién en formatu dixital).

Tamién puede presentase esta documentación per cualquiera de los sistemes establecíos n'artículu 38.4 de la Llei de Réxime Xurídicu de les Alministraciones Públiques y del Procedimientu Alministrativu Común. Si, usando esti derechu, l'expediente únviase per corréu, habrá que lu presentar en sobre abiertu pa que'l personal de correos feche y selle la solicitú primero de que se certifique.

QUINTO.— Los premios van ser concedíos acordies colos principios d'oxetividá, tresporencia, igualdá, non discriminación y publicidá, per aciu del procedimientu de concurrencia competitiva.

SESTO.— El Serviciu de Planificación Llingüística y Normalización, dependiente de la Dirección Xeneral de Planificación Llingüística y Normalización de la Consejería d'Educación y Cultura, va adoptar toles midíes necesaries pal desarrollu de les bases y d'esta convocatoria, llevando alantre la ordenación y instrucción del procedimientu. El conseyeru d'Educación y Cultura va dictar la resolución de concesión, que va publicase nel *Boletín Oficial del Principáu d'Asturies*, colo que va considerase notificada acordies lo estableció nel artículu 59.6b) de la Llei 30/92, de 26 de payares.

SÉPTIMO.— Ordenar la publicación de esta Resolución en el *Boletín Oficial del Principado de Asturias*.

OCTAVO.— Esta resolución termina la vía alministrativa y va poder ser recurrida potestativamente en reposición, énte'l Conseyeru d'Educación y Cultura, nel plazu d'un mes computáu dende'l día siguiente al de publicación d'esta resolución nel *Boletín Oficial del Principáu d'Asturies*, o ser directamente impugnada énte la Sala de lo Contencioso-Alministrativu del Tribunal Superior de Xusticia d'Asturies, nel plazu de dos meses contaos dende la publicación de la resolución, ensin perxuiciu de cualquier otru recursu que consideren procedente interponer en defensa de los sos intereses.

EL CONSEYERU D'EDUCACIÓN Y CULTURA

Genaro Alonso Megido

